

四庫全書

史部

欽定四庫全書

史部

通鑑總類卷五上
下

詳校官編修_臣李 漢

侍讀_臣孫球覆勘

總校官進士_臣朱 鈴

校對官中書_臣張曾炳

謄錄監生_臣陳 燦

欽定四庫全書

通鑑總類卷五上

宋 沈樞 撰

繼嗣門

智宣子以瑤為後

周威烈王二十三年初智宣子將以瑤為後智果曰不如宵也瑤之賢於人者五其不逮者一也美鬢長大則賢射御足力則賢伎藝畢給則賢巧文辯慧則賢彊毅果敢則賢如是而甚不仁夫以其五賢陵人而以不仁

行之其誰能待之若果立瑤也智宗必滅弗聽

趙簡子以無恤為後

趙簡子之子長曰伯魯幼曰無恤將置後不知所立乃書訓戒之辭於二簡以授二子曰謹識之三年而問之伯魯不能舉其辭求其簡已失之矣問無恤誦其辭甚習求其簡出諸袖中而奏之於是簡子以無恤為賢立以為後

趙主父欲二王其子

周赧王二十年主父初以長子章為太子後得吳娃愛之為不出者數歲生子何乃廢太子章而立之吳娃死愛弛憐故太子欲兩王之猶豫永決故亂起

漢周昌期期不奉詔

十年定陶戚姬有寵於高帝生趙王如意高帝以太子仁弱謂如意類己雖封為趙王常留之長安高帝之關東戚姬常從日夜啼泣欲立其子呂后年長常留守益疏高帝欲廢太子而立趙王大臣爭之皆莫能得御史

大夫周昌廷爭之彊高帝問其說昌為人吃又盛怒曰臣口不能言然臣期知其不可陛下欲廢太子臣期不奉詔高帝欣然而笑吕后側耳於東廂聽既罷見昌為跪謝曰微君太子幾廢時趙王年十歲高帝憂萬歲之後不全也符璽御史趙堯請為趙王置貴彊相及吕后太子羣臣素所敬憚者高帝曰誰可者堯曰御史大夫昌其人也高帝乃以昌相趙而以堯代昌為御史大夫

叔孫通諫易太子

十二年高帝從破黥布歸疾益甚愈欲易太子張良諫
不聽因疾不視事叔孫通諫曰昔者晉獻公以驪姬之
故廢太子立奚齊晉國亂者數十年為天下笑秦以不
蚤定扶蘇令趙高得以詐立胡亥自使滅祀此陛下所
親見今太子仁孝天下皆聞之呂后與陛下攻苦食啖
其可背哉陛下必欲廢適而立少臣願先伏誅以頸血
汙地高帝曰公罷矣吾直戲耳叔孫通曰太子天下本

本一搖天下振動奈何以天下為戲乎時大臣固爭者多高帝知羣臣心皆不附趙王乃止不立

絳侯等謀立文帝

八年諸大臣相與陰謀曰少帝及梁淮陽恒山王皆非真孝惠子也不如視諸王最賢者立之代王方今高帝見子最長仁孝寬厚太后家薄氏謹良且立長固順況以仁孝聞天下乎乃相與共陰使人召代王代王問左右郎中令張武等曰漢大臣皆故高帝時大將習兵多

謀詐今已誅諸呂新嘽血京師此以迎大王為名實不可信中尉宋昌進曰羣臣之議皆非也夫秦失其政諸侯豪傑並起人人自以為得之者以萬數然卒踐天子之位者劉氏也天下絕望一矣高帝封王子弟地犬牙相制此所謂磐石之宗也天下服其彊二矣漢興除秦苛政約法令施德惠人人自安難動搖三矣夫以呂太后之嚴立諸呂為三王擅權專制然而太尉以一節入北軍一呼士皆左袒為劉氏叛諸呂卒以滅之此乃天

授非人力也方今高帝子獨淮南王與大王大王又長
賢聖仁孝聞於天下故大臣因天下之心而欲迎立大
王大王勿疑也代王報太后計之猶豫未定卜之兆得
大橫占曰大橫庚庚余為天王夏啓以光代王曰寡人
固已為王矣又何王卜人曰所謂天王者乃天子也於
是代王遣太后弟薄昭往見絳侯絳侯等具為昭言所
以迎立王意乃命宋昌參乘張武等六人乘傳從詣長
安至渭橋丞相以下皆迎太尉乃跪上天子璽符遂即

天子位

有司請早立太子

元年春正月有司請蚤建太子文帝曰朕既不德縱不能博求天下賢聖有德之人而禪天下焉而曰豫建太子是重吾不德也其安之有司曰豫建太子所以重宗廟社稷不忘天下也文帝曰楚王季父也吳王兄也淮南王弟也豈不豫哉今不選舉焉而曰必予人其以朕為忘賢有德者而專於子非所以憂天下也有司固請

曰古者殷周有國治安皆千餘歲用此道也立嗣必子
所從來遠矣高帝平天下為太祖子孫繼嗣世世不絕
今釋宜建而更選於諸侯及宗室非高帝之志也更議
不宜子啓最長純厚慈仁請建以為太子文帝乃許之
太后欲以梁孝王為嗣

中二年初梁孝王以至親有功得賜天子旌旗從千乘
萬騎出蹕入警王寵信羊勝公孫詭以詭為中尉勝詭
多奇邪計欲使王求為漢嗣票太子之廢也太后意欲

以梁王為嗣嘗因置酒謂景帝曰安車大駕用梁王為
寄景帝跪席舉身曰諾罷酒景帝以訪諸大臣大臣袁
盎等曰不可昔宋宣公不立子而立弟以生禍亂五世
不絕小不忍害大義故春秋大居正由是太后議格遂
不復言王又嘗上書願賜容車之地徑至長樂宮自使
梁國士衆築作甬道朝太后袁盎等皆建以為不可梁
王由此怨袁盎及議臣乃與羊勝公孫詭謀陰使人刺
殺袁盎及他議臣十餘人景帝意梁逐賊捕公孫詭羊

勝詭勝匿王後宮內史韓安國乃入見王而泣曰大王
自度於皇帝孰與臨江王親王曰弗如也安國曰臨江王
適長太子以一言過廢王臨江用宮垣事卒自殺中尉
府今大王列在諸侯誅邪臣浮說犯上禁撓明灋天子
以太后故不忍致灋於大王太后日夜涕泣幸大王自
改大王終不覺寤有如太后宮車即晏駕大王尚誰攀
乎語未卒王泣數行而下謝安國曰吾今出勝詭王乃
令勝詭皆自殺出之景帝由此怨望梁王

武帝命皇子所生門為堯母門

太始三年皇子弗陵生弗陵母曰河間趙婕妤居鉤弋宮任身十四月而生武帝曰聞昔堯十四月而生今鉤弋亦然乃命其所生門曰堯母門臣光曰為人君者動靜舉措不可不慎發於中必形於外天下無不知之當是時也皇后太子皆無恙而命鉤弋之門曰堯母非名也是以姦臣逆探上意知其竒愛少子欲以為嗣遂有危皇后太子之心卒成巫蠱之禍悲夫

武始侯無咎無譽

征和元年三月趙敬肅王彭祖薨彭祖取江都易王所
幸淖姬生男號淖子時淖姬兄為漢宦者武帝召問淖
子何如對曰為人多欲武帝曰多欲不宜君國子民問
武始侯昌曰無咎無譽武帝曰如是可矣遣使者立昌
為趙王

韋玄成陽為病狂

元康四年初扶陽節侯韋賢薨長子宏有罪繫獄家人

矯賢今以次子大河都尉玄成為後玄成深知其非賢
雅意即陽為病狂卧便利妄笑語昏亂既葬當襲爵以
狂不應召大鴻臚奏狀章下丞相御史案驗案事丞相
史迺與玄成書曰古之辭讓必有文義可觀故能垂榮
於後今子獨壞容貌蒙耻辱為狂癡光睢眊而不宣微
哉子之所託名也僕素愚陋過為宰相執事願少聞風
聲不然恐子傷高而僕為小人也玄成友人侍郎章亦
上疏言聖王貴以禮讓為國宜優養玄成勿枉其志使

得自安衡門之下而丞相御史遂以玄成實不病劾奏之有詔勿劾引拜玄成不得已受爵宣帝高其節以玄成為何南太守

拜韋玄成為中尉以感諭憲王

甘露元年淮陽憲王好灋律聰達有材王母張婕妤尤幸宣帝由是疏太子而愛淮陽憲王數嗟歎憲王曰真我子也常有意欲立憲王然用太子起於微細宣帝少依倚許氏及即位而許后以殺死故弗忍也久之宣帝

拜韋玄成為淮陽中尉以玄成嘗讓爵於兄欲以感諭
憲王由是太子遂安

史丹諫廢太子

竟寧元年初太子少好經書寬博謹慎其後幸酒樂燕
樂元帝不以為能而山陽王康有材藝母傅昭儀又愛
幸元帝以故常有意欲以山陽王為嗣元帝晚年多疾
不親政事留好音樂或置鞀鼓殿下天子自臨軒檻上
墮銅丸以擣鼓聲中嚴鼓之節後宮及左右習知音者

莫能為而山陽王亦能之元帝數稱其材史丹進曰凡
所謂材者敏而好學溫故知新皇太子是也若乃器人
於絲竹鼓輦之間則是陳惠李微高於匡衡可相國也
於是元帝嘿然而笑及元帝寢疾數問尚書以景帝時
立膠東王故事史丹直入臥內頓首伏青蒲上涕泣言
曰皇太子以適長立積十餘年名號繫於百姓天下莫
不歸心臣子見山陽王雅素愛幸今者道路流言為國
生意以為太子有動搖之議審若此公卿以下必以死

爭不奉詔臣願先賜死以示羣臣天子素仁不忍見丹涕泣言又切至意大感寤喟然太息曰皇后謹慎先帝又愛太子吾豈可違太子由是遂定為嗣

成帝立定陶王為太子

綏和元年成帝召丞相翟方進御史大夫孔光右將軍廉褒後將軍朱博入禁中議中山定陶王誰宜為嗣者方進根褒博皆以為定陶王帝弟之子禮曰昆弟之子猶子也為其後者為之子也定陶王宜為嗣光獨以為

禮立嗣以親以尚書盤庚殷之及王為比兄終弟及中山王先帝之子帝親弟宜為嗣成帝以中山王不材又禮兄弟不得相入廟不從光議詔立定陶王欣為皇太子使執金吾任宏守大鴻臚持節徵定陶王定陶王謝曰臣材質不足以假充太子之宮臣願且得留國邸旦夕奉問起居俟有聖嗣歸國守藩書奏天子報聞

哀帝議立定陶共皇廟

建平元年郎中令冷褒黃門郎段猶等復奏言定陶共

皇太后共皇后皆不宜復引定陶藩國之名以冠大號
車馬衣服宜皆稱皇之意置吏二千石以下各供厥職
又宜為共皇立廟京師上復下其議羣下多順指言母
以子貴宜立尊號以厚孝道唯丞相光大司馬喜大司
空丹以為不可丹曰聖主制禮取灋於天地尊卑者所
以正天地之位不可亂也今定陶共皇太后共皇后以
定陶共為號者母從子妻從夫之義也欲立官置吏車
服與太皇太后並非所以明尊無二上之義也定陶共

皇號謚已前定義不得復改禮父為士子為天子祭以天子其尸服以士服子無爵父之義尊父母也為人後者為之子故為所後服斬衰三年而降其父母期明尊本祖而重正統也考成皇帝聖恩深遠故為共王立後奉承祭祀令共皇長為一國太祖萬世不毀恩義已備陛下既繼體先帝持重大宗承宗廟天地社稷之祀義不可復奉定陶共皇祭入其廟今欲立廟於京師而使臣下祭之是無主也又親盡當毀空去一國太祖不墮

之祀而就無主當毀不正之禮非所以尊厚共皇也丹由是浸不合上意

朱博傳晏謀成尊號事

二年傳太后欲求稱尊號與成帝母齊尊傳喜與孔光師丹共執以為不可哀帝重違大臣正議又內迫傳太后依違者連歲傳太后大怒哀帝不得已先免師丹以感動喜喜終不順朱博與孔鄉侯傳晏連結共謀成尊號事數燕見奏封事毀短喜及孔光遂策免喜以侯就

第復策免光為庶人以御史大夫朱博為丞相朱博既為丞相哀帝遂用其議下詔曰定陶共皇之號不宜復稱定陶尊共皇太后曰帝太后稱永信宮共皇后曰帝太后稱中安宮為共皇立寢廟於京師比宣帝父悼皇考制度於是四太后各置少府太僕秩皆中二千石傳太后既尊後尤驕與太皇太后語至謂之嫗

先武更封張純為武始侯

建武十三年富平侯張純安世之四世孫也歷王莽世

以敦謹守約保全前封建武初先來詣闕為侯如故於是
有司奏列侯非宗室不宜復國上曰張純宿衛十有餘年
其勿廢更封武始侯食富平之半

奇愛東海公陽

十五年時諸郡各遣使奏事光武見陳留吏牘上有書
視之云潁川弘農可問河南南陽不可問光武詰吏由
趣吏不肯服抵言於長壽街上得之光武怒時東海公
陽年十二在幄後言曰吏受郡敕當欲以墾田相方耳

光武曰即如此何故言河南南陽不可問對曰河南帝城多近臣南陽帝鄉多近親田宅踰制不可為準光武令虎賁將詰問吏吏乃實首服如東海公對光武由是益竒愛陽

郅惲說太子彊辭位

十九年郭后既廢太子彊意不自安郅惲說太子曰久處疑位上違孝道下近危殆不如辭位以奉養母氏太子從之數因左右及諸王陳其懇誠願備藩國光武不

忍遲回者數歲六月戊申詔曰春秋之義立子以貴東
海王陽皇后之子宜承大統皇太子彊宗執謙退願備
藩國父子之情重久違之其以彊為東海王立陽為皇
太子改名莊袁宏論曰夫建太子所以重宗統一民
心也非有大惡於天下不可移也世祖中興漢業宜
遵正道以為後凜今太子之德未虧於外內寵既多嫡
子遷位可謂失矣然東海歸藩謙恭之心彌亮明帝承
統友于之情愈篤雖長幼易位興廢不同父子兄弟至

性無間夫以三代之道處之亦何以過乎

丁鴻不肯襲封

永平十年初陵陽侯丁綝卒子鴻當襲封上書稱病讓國於弟盛不報既葬乃挂衰經於冢廬而逃去友人九江鮑駿遇鴻於東海讓之曰昔伯夷吳札亂世權行故得申其志耳春秋之義不以家事廢王事今子以兄弟私恩而絕父不滅之基可乎鴻感悟垂涕乃還就國鮑駿因上書薦鴻經學至行明帝徵鴻為侍中

劉愷讓其弟憲

永元十年初居巢侯劉般薨子愷當嗣稱父遺意讓其弟憲遁逃久之有司奏請絕愷國肅宗美其義特優假之愷猶不出積十餘歲有司復奏之侍中賈逵上書曰孔子稱能以禮讓為國乎何有有司不原樂善之心而繩以循常之凜懼非長克讓之風成含弘之化也帝納之下詔曰王濛崇善成人之美其聽憲嗣爵遭事之宜後不得以為比乃徵愷拜為郎

太僕來歷諫廢太子

延光三年江京樊豐等譖殺太子乳母王男邴吉等太子思男吉京豐懼乃與閭后構譖太子安帝怒召公卿以下議廢太子太僕來歷與太常桓焉廷尉捷為張皓議曰經說年未滿十五過惡不在其身且男吉之謀皇太子容有不知宜選忠良保傳輔以禮義廢置事重此誠聖恩所宜宿留安帝不從張皓退復上書曰昔賊臣江充造構讒逆傾覆戾園孝武久乃覺寤雖追前失悔之

何及今皇太子方十歲未習保傅之教可遽責乎書奏
不省九月丁酉廢皇太子保為濟陰王來歷等十餘人
俱詣鴻都門證太子無過安帝乃使中常侍奉詔脅羣
臣曰父子一體天性自然以義割恩為天下也歷諷等
不識大典而與羣小共為謹譁外見忠直而內希後福
飾邪違義豈事君之禮朝廷廣開言事之路故且一切
假貸若懷迷不反當顯明刑書諫者莫不失色歷獨守
闕連日不肯去安帝大怒乃免歷兄弟官削國租黜歷

母武安公主不得會見

袁紹欲以尚為後

建安七年袁紹自軍敗慙憤發病嘔血薨初紹有三子
譚熙尚紹後妻劉氏愛尚數稱於紹紹欲以為後而未
顯言之乃以譚繼兄後出為青州刺史沮授諫曰世稱
萬人逐兔一人獲之貪者悉止分定故也譚長子當為
嗣而斥使居外禍其始此矣

劉琦謀安於諸葛亮

十三年初劉表二子琦琮表為琮娶其後妻蔡氏之姪
蔡氏遂愛琮而惡琦表妻弟蔡瑁外甥張允並得幸於
表日相與毀琦而譽琮琦不自寧與諸葛亮謀自安之
術亮不對後乃共升高樓因令去梯謂亮曰今日上不
至天下不至地言出子口而入吾耳可以言未亮曰君
不見申生在內而危重耳居外而安乎琦意感悟陰規
出計

魏曹操立丕為太子

二十二年初魏王操娶丁夫人無子妾劉氏生子昂卞氏生四子丕彰植熊植性機警多藝能才藻敏贍操愛之黃門侍郎廙及丞相主簿楊修數稱臨菑侯植之才勸操立以為嗣操以函密訪於外尚書崔琰露板答曰春秋之義立子以長加五官將仁孝聰明宜承正統琰以死守之尚書僕射毛玠曰近者袁紹以嫡庶不分覆宗滅國廢立大事非所宜聞東曹掾邢顗曰以庶代宗先世之戒也願殿下深察之丕使人問太中大夫賈詡

以自固之術詡曰願將軍恢崇德度躬素士之業朝夕孜孜不違子道如此而已丕從之深自砥礪它日操屏人問詡詡嘿然不對操曰與卿言而不答何也詡曰屬有所思故不即對耳操曰何思詡曰思袁本初劉景升父子也操大笑操嘗出征丕植並送路側植稱述功德發言有章左右屬目操亦悅焉丕悵然自失濟陰吳質耳語曰王當行流涕可也及辭丕涕泣而拜操及左右咸獻欵宮人左右並為之稱說故遂定為太子左右長

御賀卞夫人曰將軍拜太子天下莫不喜夫人當傾府藏以賞賜夫人曰王自以丕年大故用為嗣我但當以免無教導之過為幸耳亦何為當重賜遺乎長御還具以語操操悅曰怒不變容喜不失節故最為難太子抱議郎辛毗頸而言曰辛君知我喜不毗以告其女憲英憲英歎曰太子代君主宗廟社稷者也代君不可以不戚主國不可以不懼宜戚宜懼而反以為喜何以能久魏其不昌乎

曹丕立貶曹植為安鄉侯

黃初元年王弟鄢陵侯彰等皆就國臨菑監國謁者灌
均希指奏臨菑侯植醉酒悖慢劫脅使者王貶植為安
鄉侯誅右刺姦掾沛國丁儀及弟黃門侍郎廙并其男
口皆植之黨也魚豢論曰諺言貧不學儉卑不學恭
非人性分殊也執使然耳假令太祖防遏植等在於
疇昔此賢之心何緣有窺望乎彰之挾恨尚無所至
於植者豈能興難乃令楊修以倚注遇害丁儀以希意

族滅哀夫

明帝下詔明繼統之義

太和三年詔曰禮王后無嗣擇建支子以繼大宗則當纂正統而奉公義何得復顧私親哉漢宣繼昭帝後加悼考以皇號哀帝以外藩援立而董宏等稱引亡秦惑誤時朝既尊恭皇立廟京都又寵藩妾使比長信叙昭穆於前殿並四位於東宮僭差無度人神弗祐而非罪師丹忠正之諫用致丁傳焚如之禍自是之後相踵行

之昔魯文逆祀罪由夏父宋國非度譏在華元其令公卿有司深以前世行事為戒後嗣萬一有由諸侯入奉大統則當明為人後之義敢為佞邪導諛時君妄建非正之號以干正統謂考為皇稱妣為后則股肱大臣誅之無赦其書之金策藏之宗廟著于令典

吳主廢和立亮

嘉平二年初會稽潘夫人有寵於吳主生少子亮吳主愛之以魯王霸結朋黨以害其兄心亦惡之謂侍中孫

峻曰子弟不睦臣下分部將有袁氏之敗為天下笑遂有廢和立亮之意驃騎將軍朱據諫曰太子國之本根加以雅性仁孝天下歸心昔晉獻用驪姬而申生不存漢武信江充而戾太子冤死臣竊懼太子不堪其憂雖立思子之宮無所復及矣吳主不聽遂廢太子和為庶人徙故鄣賜魯王霸死人

吳主頗悟太子和無罪

三年吳主頗悟太子和之無罪後吳主祀南郊還得風

疾欲召和還全公主及侍中孫峻中書令孫宏固爭之
乃止吳主以太子亮幼少議所付託孫峻薦大將軍諸
葛恪可付大事吳主嫌恪剛狠自用峻曰當今朝臣之
才無及恪者乃召恪於武昌恪將行上大將軍呂岱戒
之曰世方多難子每事必十思恪曰昔季文子三思而
後行夫子曰再思可矣今君令恪十思明恪之劣也岱
無以答時咸謂之失言

晉衛瓘撫牀

咸寧四年徵征北大將軍衛瓘為尚書令是時朝野咸知太子昏愚不堪為嗣瓘每欲陳啓而未敢發會侍宴凌雲臺瓘陽醉跪帝牀前曰臣欲有所啓武帝曰公所言何邪瓘欲言而上者三因以手撫牀曰此座可惜武帝意悟因謬曰公真大醉邪瓘於此不復有言武帝悉召東宮官屬為設宴會而密封尚書疑事令太子決之賈妃大懼倩外人代對多引古義給使張泓曰太子不學陛下所知而答詔多引古義必責作草主更益譴負

不如直以意對妃大喜謂泓曰便為我好答富貴與汝共之泓即具草令太子自寫武帝省之甚悅先以示瓘瓘大踴躍衆人乃知瓘嘗有言也賈充密遣人語妃云衛瓘老奴幾破汝家

和嶠言惠帝不了家事

永熙元年初和嶠嘗從容言於武帝曰皇太子有淳古之風而末世多偽恐不了陛下家事武帝默然後與荀勗等同侍武帝武帝曰太子近入朝差長進卿等俱詣

之粗及世事既還勗等並稱太子明識雅度誠如明詔
嶠曰聖質如初武帝不悅而起及惠帝即位嶠從太子
適入朝賈后使惠帝問曰卿昔謂我不了家事今日定
如何嶠曰臣昔事先帝曾有斯言言之不效國之福也

明帝喜文辭善武藝

大興元年立王太子紹為皇太子太子仁孝喜文辭善
武藝好賢禮士容受規諫與庾亮溫嶠等為布衣之交
亮風格峻整善談老莊元帝器重之聘亮妹為太子妃

元帝以賀循行太子太傅周顗為少傅庾亮以中書郎侍講東宮元帝好刑名家以韓非書賜太子庾亮諫曰申韓刻薄傷化不足留聖心太子納之

庾冰說成帝立母弟為嗣

咸康八年成帝不豫二子丕奕皆在襁褓庾冰自以兄弟秉權日久恐易世之後親屬愈疎為它人所間每說成帝以國有彊敵宜立長君請以母弟琅邪王岳為嗣成帝許之中書令何充曰父子相傳先王舊典易之者

鮮不致亂故武王不授聖弟非不愛也今琅邪踐阼將如孺子何冰不聽下詔以岳為嗣冰充及武陵王晞會稽王昱尚書令諸葛恢並受顧命成帝幼冲嗣位不親庶政及長頗有勤儉之德

石虎殺太子宣

永和四年趙秦公韜有寵於趙王虎欲立之以太子宣長猶豫未決宣嘗忤旨虎怒曰悔不立韜也韜由是益驕宣謂所幸楊杯牟成趙生曰凶豎傲慢敢爾汝能殺

之吾入西宮當盡以韜之國邑分封汝等韜死主上必
臨喪吾因行大事蔑不濟矣桎等許諾殺韜置其刀前
而去旦日宣奏之虎哀驚氣絕久之方蘇虎疑宣殺韜
囚宣於席庫以鐵環穿其領而鑠之積柴於鄴北送宣
其下使韜所幸宦者郝稚劉霸拔其髮抽其舌牽之登
梯郝稚以繩貫其領鹿盧絞上劉霸斷其手足斫眼潰
腸如韜之傷四面縱火煙炎際天火滅取灰分置諸門
交道中殺其妻子九人宣少子纔數歲虎素愛之抱之

而泣欲赦之其大臣不聽就抱中取而殺之又廢其后杜氏為庶人誅其四率已下三百人宦者五十人皆車裂節解東宮衛士十餘萬人皆謫戍涼州

北魏立太子先殺其母

晉安帝義熙五年魏主珪將立齊王嗣為太子魏故事凡立嗣子輒先殺其母乃賜嗣母劉貴人死珪召嗣諭之曰漢武帝殺鉤弋夫人以防母后預政外家為亂也汝當繼統故吾遠迹古人為國家長久之計耳嗣性孝

哀泣不自勝

宋謝晦言神器至重不可使負荷非才

永初三年皇太子多狎羣小謝晦言於武帝曰陛下春秋既高宜思存萬世神器至重不可使負荷非才武帝曰廬陵何如晦曰臣請觀焉出造廬陵王義真義真盛欲與談晦不甚答還曰德輕於才非人主也出義真為都督

北魏主用六人以輔弼太子

魏主遣中使密問白馬公崔浩曰屬者日食趙代之分朕疾彌年不愈恐一旦不諱諸子並少將若之何其為我思身後之計浩曰自聖代龍興不崇儲貳是以永興之始社稷幾危今宜早建東宮選賢公卿以為師傅皇子燾年將周星明獻溫而立子以長禮之大經若必待成人然後擇之倒錯天倫則名亂之道也魏主復以問南平公長孫嵩對曰立長則順置賢則人服燾長且賢天所命也帝從之立太平王燾為皇太子以長孫嵩及

山陽公奚斤北新公安同為左輔崔浩與太尉穆觀散
騎常侍代人丘堆為右弼百官總已以聽焉帝避居西
宮時隱而窺之聽其決斷大悅謂侍臣曰嵩宿德舊臣
歷事四世功存社稷斤辯捷智謀名聞遐邇同曉解俗
情明練於事觀達於政要識吾旨趣浩博聞彊識精察
天人堆雖無大用然在公專謹以此六人輔相太子吾
與汝曹巡行四境伐叛柔服足以得志於天下矣

宋徐羨之等廢營陽王

元嘉元年徐羨之等以南兖州刺史檀道濟先朝舊將
威服殿省且有兵衆乃召道濟及江州刺史王弘入朝
皆至建康以廢立之謀告之謝晦聚將士於府內又使
中書舍人邢安泰潘盛為內應時帝於華林園為列肆
親自沽賣又與左右引船為樂夕遊天淵池即龍舟而
寢詰旦道濟羨之等入自雲龍門扶帝出東閤收璽綬
衛送故太子宫以宜都王義隆素有令望入多符瑞乃
稱皇太后令數帝過惡廢為營陽王以宜都王纂承大

統赦死罪以下裴子野論曰古者人君養子能言而師授之辭能行而傳相之禮宋之教誨雅異於斯居中則任僕妾處外則近趨走言不及於禮義識不達於今古雖有師傅多以耆艾大夫為之雖有友及文學多以膏粱年少為之具位而已是以本支雖茂而端良甚寡降及太宗舉天下而棄之亦昵比之為也嗚呼有國有家其鑑之矣

北魏顯祖傳位太子

宋明帝泰始七年魏顯祖聰睿夙成剛毅有斷而好黃
老浮屠之學每引朝士及沙門共談玄理雅薄富貴常
有遺世之心以叔父京兆王子推沈雅仁厚素有時譽
欲禪以帝位會公卿大議皆莫敢先言任城王雲子推
之弟也對曰父子相傳其來久矣陛下必欲委棄塵務
則皇太子宜承正統夫天下者祖宗之天下陛下若更
授旁支恐非先聖之意啓姦亂之心斯乃禍福之原不
可不慎也源賀曰陛下今欲禪位皇叔臣恐紊亂昭穆

後世必有逆祀之譏願深思任城之言東陽公丕等曰
皇太子雖聖德早彰然實冲幼陛下富於春秋始覽萬
機奈何欲隆獨善不以天下為心其若宗廟何其若億
兆何尚書陸贄曰陛下若捨皇太子更議諸王臣請刻
頸殿庭不敢奉詔以問宦者趙黑黑曰臣以死奉戴皇
太子不知其它帝乃曰然則立太子羣公輔之有何不
可又曰陸馥直臣也必能保吾子乃以馥為太保與源
質持節奉皇帝璽綬傳位於太子高祖即皇帝位大赦

改元延興顯祖下詔曰朕希心玄古志存澹泊受命儲
宮踐升大位朕得優游恭已栖心浩然羣臣奏曰昔漢
高祖稱皇帝尊其父為太上皇明不統天下也今皇帝
幼冲萬機大政猶宜陛下總之謹上尊號曰太上皇帝
顯祖從之徙居崇光宮采掇不斷土階而已又建鹿野
浮圖於苑中之西山與禪僧居之

北魏主語及太子恂

齊明帝建武四年魏立皇子恪為太子魏主宴於清徽

堂語及太子恂李冲謝曰臣忝師傅不能輔導帝曰朕尚不能化其惡師傅何謝也

崔光迎魏太子即位

梁武帝天監十四年魏主殂太子少傅崔光將軍于忠詹事王顯中庶子代人侯剛迎太子詔於東宮至顯陽殿王顯欲須明行即位禮崔光曰天位不可暫曠何待至明顯曰須奏中宮光曰帝崩太子立國之常典何須中宮令也於是光攝太尉奉策進璽綬太子跪受服衮

冕之服御太極殿即皇帝位光等與夜直羣官立庭中
北面稽首稱萬歲廣平王懷扶疾入臨徑至太極西廡
哀慟呼侍中黃門領軍二衛云身欲上殿哭大行又須
入見主上衆皆愕然相視無敢對者崔光攘袂振杖引
漢光武崩趙熹扶諸王下殿故事辭色甚厲聞者莫不
稱善懷聲淚俱止曰侍中以古義裁我我敢不服遂還
仍頻遣左右致謝

梁豫章王七月而生

普通六年初武帝納齊東昏侯寵姬吳淑媛七月而生
豫章王綜宮中多疑之及淑媛寵衰怨望密謂綜曰汝
七月生兒安得比諸皇子然汝太子次弟幸保富貴勿
泄也與綜相抱而泣綜由是自疑晝則談謔如常夜則
於靜室閉戶披髮席藁私於別室祭齊氏七廟又微服
至曲阿拜齊太宗陵聞俗說割血瀝骨滲則為父子遂
潛發東昏侯冢并自殺一男試之皆驗由是常懷異志
專伺時變綜有勇力能手制奔馬輕財好士唯留附身

故衣餘皆分施恒致罄乏屢上便宜求為邊任武帝未之許常於內齋布沙於地終日跣行足下生胝日能行三百里王侯妃主及外人皆知其志武帝性嚴重人莫敢言後卒降於北魏

北魏高歡欲廢澄而立洸

梁武帝大同元年勃海世子澄通於歡妾鄭氏歡歸一婢告之二婢為證歡杖澄一百而幽之妻妃亦隔絕不得見歡納魏敬宗之后爾朱氏有寵生子洸歡欲立之

澄求救於司馬子如子如入見歡偽為不知者請見婁
妃歡告其故子如曰消難亦通子如妾此事正可掩覆
妃是王結髮婦常以父母家財奉王王在懷朔被杖背
無完皮妃晝夜供侍後避葛賊同走并州貧因妃然馬
矢自作靴恩義何可忘也夫婦相宜女配至尊男承大
業且婁領軍之勲何宜搖動一女子如草芥況婢言不
必信邪歡因使子如更鞠之子如見澄尤之曰男兒何
意畏威自誣因教二婢反其辭脅告者自縊乃啓歡曰

果虛言也歡大悅召婁妃及澄妃遙見歡一步一叩頭
澄且拜且進父子夫婦相泣復如初歡置酒曰全我父
子者司馬子如也賜之黃金

李遠言立子以嫡不以長

敬帝太平元年魏太師泰尚孝武妹馮翊公主生畧陽
公覺姚夫人生寧都公毓毓於諸子最長娶大司馬獨
孤信女泰將立嗣謂公卿曰孤欲立子以嫡恐大司馬
有疑如何衆默然未有言者尚書左僕射李遠曰夫立

子以嫡不以長畧陽公為世子公何所疑若以信為嫌
請先斬之遂拔刀而起泰亦起曰何至於是信又自陳
解遠乃止於是羣公並從遠議遠出外拜謝信曰臨大
事不得不爾信亦謝遠曰今日賴公決此大議遂立覺
為世子

中山公護受宇文泰顧託

魏安定文公宇文泰還至牽屯山而病驛召中山公護
護至涇州見泰泰謂護曰吾諸子皆幼外寇方彊天下

之事屬之於汝宜努力以成吾志遂卒於雲陽護還長
安發喪泰能駕御英豪得其力用性好質素不尚虛飾
明達政事崇儒好古凡所施設皆依倣三代而為之世
子覺嗣位為太師枉國大冢宰出鎮同州時年十五中
山公護名位素卑雖為泰所屬而羣公各圖執政莫肯
服從護問計於大司寇于謹謹曰謹早蒙先公非常之
知恩深膏骨今日之事必以死爭之若對衆定策公必
不得讓明日羣公會議謹曰昔帝室傾危非安定公無

復今日今公一旦違世嗣子雖幼中山公親其兄子兼受顧託軍國之事理須歸之辭色抗厲衆皆悚動護曰此乃家事護雖庸昧何敢有辭謹素與泰等夷護常拜之至是謹起而言曰公若統理軍國謹等皆有所依遂再拜羣公迫於謹亦再拜於是衆議始定護綱紀內外撫循文武人心遂安

北齊顯祖欲廢太子

陳武帝永定二年北齊太子殷自幼溫裕開朗禮士好

學關覽時政甚有美名顯祖常嫌太子得漢家性質不似我欲廢之顯祖登金鳳臺召太子使手刃囚太子惻然有難色再三不斷其首大怒親以馬鞭撞之太子由是氣悸語吃精神昏擾顯祖因酣宴屢云太子性懦社稷事重終當傳位常山太子少傅魏收謂楊愔曰太子國之根本不可動搖至尊三爵之後每言傳位常山令臣下疑貳若其實也當決行之此言非所以為戲恐徒使國家不安愔以收言白顯祖顯祖乃止

高元海為長廣王畫策

文帝天嘉二年齊主之誅楊燕也許以長廣王湛為太弟既而立太子百年湛心不平肅宗在晉陽湛居守於鄴先是濟南閔悼王常在鄴望氣者言鄴中有天子氣平秦王歸彥恐濟南王復立為已不利勸肅宗除之肅宗乃使歸彥至鄴徵濟南王如晉陽湛內不自安問計於高元海即留元海於後堂元海達旦不眠惟遠牀徐步夜漏未盡湛遽出曰神筭如何元海曰有三策恐不

堪用耳請殿下如梁孝王故事從數騎入晉陽先見太后求哀後見主上請去兵權以死為限不干朝政必保太山之安此上策也不然當具表云威權太盛恐取謗衆口請青齊二州刺史沈靖自居必不招物議此中策也更問下策曰濟南世嫡主上假太后令而奪之今集文武示以徵濟南之敕尊立濟南號令天下以順討逆此萬世一時也湛大悅然性怯狐疑未能用使術士鄭道謙等卜之皆曰不利舉事靜則吉有林慮令潘子密

曉占候潛謂湛曰宮車當晏駕殿下為天下主湛拘之於內以候之又令巫覡卜之多云不須舉兵自有大慶會肅宗出畋墜地絕肋詔以嗣子沖眇可遣尚書右僕射趙郡王叡諭旨徵長廣王湛統茲大寶

祖珽勸齊世祖傳位東宮

六年世祖為長廣王珽為胡桃油獻之因言殿下有非常骨法孝徵夢殿下乘龍上天王曰若然當使兄大富貴及即位擢拜中書侍郎遷散騎常侍與和士開共為

姦諂珽私說士開曰君之寵幸振古無比宮車一日晚
駕欲何以克終士開因從問計珽曰宜說主上云文襄
文宣孝昭之子俱不得立今宜令皇太子早踐大位以
定君臣之分若事成中宮少主必皆德君此萬全計也
請君微說主上令粗解珽當自外上表論之士開許諾
會有彗星見太史奏云彗除舊布新之象當有易主珽
於是上書言陛下雖為天子未為極貴宜傳位東宮且
以上應天道并上魏顯祖禪子故事齊主從之使太宰

段韶持節奉皇帝璽綬傳位於太子緯太子即皇帝位
於晉陽宮大赦改元天統祖珽拜祕書監加儀同三司
大被親寵見重二宮

陳世祖欲遵太伯之事

天康元年世祖不豫太子伯宗柔弱世祖憂其不能守
位謂安成王頊曰吾欲遵太伯之事頊拜伏泣涕固辭
世祖又謂到仲舉孔奭等曰今三方鼎峙四海事重宜
須長君朕欲近則晉成遠隆殷法卿等宜遵此意孔奭

流涕對曰陛下御膳違和瘥復非久皇太子春秋鼎盛聖德日躋安成王介弟之尊足為周旦若有廢立之心臣等愚誠不敢聞詔世祖曰古之遺直復見於鄉乃以真為太子詹事臣光曰夫臣之事君宜將順其美正救其惡孔奐在陳處腹心之重任決社稷之大計苟以世祖之言為不誠則當如竇嬰面辨袁盎廷爭防微杜漸以絕覬覦之心以為誠邪則當請明下詔書宣告中外使世祖有宋宣之美高宗無楚靈之惡不然謂太

子嫡嗣不可動搖欲保輔而安全之則當盡忠竭節以死繼之如晉之荀息趙之肥义奈何于君之存則逆探其情而求合焉及其既沒則權臣移國而不能救嗣主失位而不能死斯乃姦諛之尤者而世祖謂之遺直以託六尺之孤豈不悖哉

隋高祖廢太子勇

開皇二十年勇嘗宴宮臣唐令則自彈琵琶歌斌媚娘洗馬李綱起白勇曰令則身為宮卿職當調護乃於廣

坐首比倡優進淫聲穢視聽事若上聞令則罪在不測
豈不為殿下之累邪臣請速治其罪勇曰我欲為樂耳
君勿多事綱遂趨出及勇廢高祖召東宮之屬切責之
皆惶懼無敢對者綱獨曰太子性本中人可與為善可
與為惡彛使陛下擇正人輔之足以嗣守鴻基今乃以
唐令則為左庶子鄒文騰為家令二人唯知以絃歌鷹
犬娛悅太子安得不至于是邪此乃陛下之過非太子
之罪也自古國家廢立冢嫡鮮不傾危願陛下深留聖

思無貽後悔高祖不悅罷朝左右皆為之股栗會尚書右丞缺有司請人高祖指綱曰此佳右丞也即用之

唐高宗欲置皇太孫官屬

永淳元年立皇孫重照為皇太孫高宗欲令開府置僚屬問吏部郎中王方慶對曰晉及齊皆嘗立太孫其太子官屬即為太孫官屬未聞太子在東宮而更立太孫者也高宗曰自我作古可乎對曰三王不相襲禮何為不可乃奏置師傅等官既而高宗疑其非法竟不補授

太后廢中宗立睿宗

光宅元年中宗欲以韋玄貞為侍中又欲授乳母之子五品官裴炎固爭中宗怒曰我以天下與韋玄貞何不
可而惜侍中邪炎懼白太后密謀廢立太后集百官於
乾元殿裴炎與中書侍郎劉祿之羽林將軍程務挺張
虔勛勒兵入宮宣太后令廢中宗為廬陵王扶下殿中
宗曰我何罪太后曰汝欲以天下與韋玄貞何得無罪
乃幽於別所立雍州牧豫王旦為皇帝政事決於太后

居睿宗於別殿不得有所預

李昭德諫立武承嗣為皇太子

天授二年張嘉福使洛陽人王慶之等數百人上表請立武承嗣為皇太子岑長倩以皇嗣在東宮不宜有此議奏請切責上書者告示令散太后又問格輔元輔元固稱不可由是大忤諸武意皆坐誅王慶之見太后太后曰皇嗣我子奈何廢之對曰神不歆非類民不祀非族今誰有天下而以李氏為嗣乎太后諭遣之慶之屢

求見太后頗怒之命李昭德引出光政門外以示朝士
曰此賊欲廢我皇嗣立武承嗣命撲之耳目皆血出然
後杖殺之其黨乃散昭德因言於太后曰天皇陛下之
夫皇嗣陛下之子陛下身有天下當傳之子孫為萬代
業豈得以姪為嗣乎自古未聞姪為天子而為姑立廟
者也且陛下受天皇顧託若以天下與承嗣則天皇不
血食矣太后亦以為然

李昭德言武承嗣權太重

長壽元年夏官侍郎李昭德密言於太后曰魏王承嗣
權太重太后曰吾姪也故委以腹心昭德曰姪之於姑
其親何如子之於父子猶有篡弑其父者况姪乎今承
嗣既陛下之姪為親王又為宰相權侔人主臣恐陛下
不得久安天位也太后矍然曰朕未之思以武承嗣為
特進納言罷政事承嗣亦毀昭德於太后太后曰吾任
昭德始得安眠此代吾勞汝勿言也是時酷吏恣橫百
官畏之側足昭德獨廷奏其姦

狄仁傑等勸太后復立中宗

聖歷元年武承嗣三思營求為太子數使人說太后曰自古天子未有以異姓為嗣者太后意未決狄仁傑每從容言於太后曰文皇帝擲風沐雨親冒鋒鏑以定天下傳之子孫大帝以二子託陛下陛下今乃欲移之它族無乃非天意乎且姑姪之與母子孰親陛下立子則千秋萬歲後配食太廟承繼無窮立姪則未聞姪為天子而祔姑於廟者也太后曰此朕家事卿勿預知仁傑

曰王者以四海為家四海之內孰非臣妾何者不為陛下家事君為元首臣為股肱義同一體況臣備位宰相豈得不預知乎又勸太后召還廬陵王王方慶王及善亦勸之太后意稍寤它日又謂仁傑曰朕夢大鸚鵡兩翼皆折何也對曰武者陛下之姓兩翼二子也陛下起二子則兩翼振矣太后由是無立承嗣三思之意吉頊與張易之昌宗皆為控鶴監供奉頊從容說二人曰公兄弟貴寵如此非以德業取之也天下側目切齒多矣

不有大功於天下將何以自全竊為公憂之二人懼涕
泣問計項曰天下士庶未忘唐德咸復思廬陵王主上
春秋高大業須有所付武氏諸王非所屬意公何不從
容勸主上立廬陵王以繫蒼生之望如此豈徒免禍亦
可以長保富貴矣二人以為然乘間屢為太后言之太
后知謀出於項乃召問之項復為太后具陳利害太后
意乃定

蘇安恒疏諫太后禪位東宮

長安元年蘇安恒上疏曰陛下欽先聖之顧託受嗣子之推讓敬天順人二十年矣豈不聞帝舜褰裳周公復辟舜之於禹事祇族親旦與成王不離叔父族親何如子之愛叔父何如母之恩今太子孝敬是崇春秋既壯若使統臨宸極何異陛下之身陛下年德既尊寶位將倦機務繁重浩蕩心神何不禪位東宮自怡聖體自昔理天下者不見二姓而俱王也當今梁定河內建昌諸王承陛下之蔭覆並得封王臣謂千秋萬歲之後於事

非便臣請黜為公侯任以閒簡臣又聞陛下有二十餘
孫今無尺寸之封此非長久之計也臣請分土而王之
擇立師傅教其孝敬之道以夾輔周室屏藩皇家斯為
美矣疏奏太后召見賜食慰諭而遣之

蘇安恒又疏諫天后歸政李氏

二年蘇安恒復上疏曰臣聞天下者神堯文武之天下
也陛下雖居正統實因唐氏舊基當今太子追迴年德
俱盛陛下貪其實位而忘母子深恩將何聖顏以見唐

家宗廟將何誥命以謁大帝墳陵陛下何故日夜積憂
不知鐘鳴漏盡臣愚以為天意人事還歸李家陛下雖
安天位殊不知物極則反器滿則傾臣何惜一朝之命
而不安萬乘之國哉太后亦不之罪

太平公主欲易太子

景雲元年太平公主以太子年少意頗易之既而憚其
英武欲更擇闇弱者立之以久其權數為流言云太子
非長不當立制戒諭中外以息浮議公主每覘伺太子

所為纖介必聞於睿宗太子左右亦往往為公主耳目
太子深不自安

張說姚崇勸睿宗命明皇監國

二年太平公主與益州長史竇懷貞等結為朋黨欲以
危太子睿宗嘗密召韋安石謂曰聞朝廷皆傾心東宮
卿宜察之對曰陛下安得亡國之言此必太平之謀耳
太子有功於社稷仁明孝友天下所知願陛下無惑讒
言睿宗瞿然曰朕知之矣卿勿言時公主在簾下竊聽

之以飛語陷安石公主又嘗乘輦邀宰相於光範門內
諷以易置東宮衆皆失色宗璟抗言曰東宮有大功於
天下真宗廟社稷之主公主奈何忽有此議頃之睿宗
謂侍臣曰術者言五日中當有急兵入宮卿等為朕備
之張說曰此必讒人欲離間東宮願陛下使太子監國
則流言自息矣姚元之曰張說所言社稷之至計也睿
宗悅太平公主蒲州安置命太子監國六品以下除官
及徒罪以下並取太子處分

明皇命宋璟制皇子名號

開元五年明皇命宋璟蘇頲為諸皇子制名及國邑之號又令別制一佳名及佳號進之璟等上言七子均養著於國風今臣等所制名號各三十餘輒混同以進以彰陛下覆燾無偏之德明皇甚善之

李子嶠自稱皇子

十四年太原尹張孝嵩奏有李子嶠者自稱皇子云生於潞州母曰趙妃明皇命杖殺之

明皇擢用楊崇禮二子

二十一年太府卿楊崇禮在太府二十餘年前後為太府者莫能及時承平日久財貨山積嘗經楊卿者無不精美每歲句駁省便出錢數百萬緡是歲以戶部尚書致仕年九十餘矣明皇問宰相崇禮諸子誰能繼其父者對曰崇禮三子慎餘慎矜慎名皆廉勤有才而慎矜為優明皇乃擢慎矜自汝陽令為監察御史知太府出納慎名攝監察御史知含嘉倉出給亦皆稱職明皇甚

悅之慎矜奏諸州所輸布帛有漬污穿破者皆下本州徵折估錢轉市輕貨徵調始繁矣

明皇欲廢太子

二十四年明皇為臨苗王也趙麗妃皇甫德儀劉才人皆有寵麗妃生太子瑛德儀生鄂王瑶才人生光王琚及即位幸武惠妃麗妃等愛皆弛惠妃生壽王瑁寵冠諸子太子與瑤琚會於內第各以母失職有怨望語惠妃泣訴於明皇曰太子陰結黨與將害妾母子亦指斥

至尊明皇大怒以語宰相欲皆廢之九齡曰三子皆已
成人不聞大過陛下奈何一旦以無根之語盡廢之乎
且太子天下本不可輕搖昔晉獻公聽驪姬之讒殺申
生三世大亂漢武帝信江充之誣罪戾太子京城流血
晉惠帝用賈后之譖廢愍懷太子中原塗炭隋文帝納
獨孤后之言黜太子勇立煬帝遂失天下由此觀之不
可不慎陛下必欲為此臣不敢奉詔明皇不悅林甫初
無所言退而私謂宦官之貴幸者曰此主上家事何必

問外人明皇猶豫未決惠妃密使官奴牛貴兒謂九齡曰有廢必有興公為之援宰相可長處九齡叱之以其語白明皇明皇為之動色故訖九齡罷相太子得無動

明皇殺三子

二十五年楊洄又譖太子瑛鄂王瑶光王琚云與太子妃兄駙馬薛鏞潛構異謀明皇召宰相謀之李林甫對曰此陛下家事非臣等所宜豫明皇意乃決使宦者宣制於宮中廢瑛瑶琚為庶人流鏞于瀛州瑛瑶琚尋賜

死城東驛鏞賜死於藍田瑤琚皆好學有才識死不以
罪人皆惜之

立忠王璵為太子

二十六年太子璵既死李林甫數勸明皇立壽王瑁明
皇以忠王璵年長且仁孝恭謹又好學意欲立之猶豫
歲餘不決自念春秋浸高三子同日誅死繼嗣未定常
忽忽不樂寢膳為之減高力士乘間請其故明皇曰汝
我家老奴豈不能揣我意力士曰得非以郎君未定邪

明皇曰然對曰大家何必如此虛勞聖心但推長而立誰敢復爭明皇曰汝言是也汝言是也由是遂定立璵為太子

明皇付傳國寶冊于肅宗

至德元載靈武使者至蜀上皇喜曰吾兒應天順人吾復何憂制自今改制敕為誥表疏稱太上皇四海軍國事皆先取皇帝進止仍奏朕知俟克復上京朕不復預事上皇臨軒命韋見素房琯崔渙奉傳國寶玉冊詣靈

武傳位

李泌諫肅宗保全廣平王

二載捷書至鳳翔百寮入賀肅宗以駿馬名李泌於長安既至泌曰臣今報德足矣復為閒人何樂如之肅宗曰朕與先生累年同憂患今方相同娛樂奈何遽欲去乎泌曰臣有五不可留願陛下聽臣去免臣於死肅宗曰何謂也對曰臣遇陛下太早陛下任臣太重寵臣太深臣功太高迹太奇此其所以不可留也肅宗曰不意

卿疑朕如此豈有如朕而辦殺卿邪是直以朕為句踐也對曰陛下不辦殺臣故臣求歸若其既辦臣安得復言且殺臣者非陛下也乃五不可也肅宗良久曰卿以朕不從卿北伐之謀乎對曰非也所不敢言者乃建寧耳肅宗曰建寧朕之愛子性英果艱難時有功朕豈不知之但因此為小人所教欲害其兄圖繼嗣朕以社稷大計不得已而除之卿不細知其故邪對曰若有此心廣平當怨之廣平每與臣言其冤輒流涕嗚咽臣今必

辭陛下去始敢言之耳肅宗曰渠嘗夜捫廣平意欲加害對曰此皆出讒人之口豈有建寧之孝友聰明肯為此乎且陛下昔欲用建寧為元帥臣請用廣平建寧若有此心當深憾於臣而以臣為忠益相親善陛下以此可察其心矣肅宗乃泣下曰先生言是也既往不咎朕不欲聞之泌曰臣所以言之者非咎既往乃欲陛下慎將來耳昔天后有四子長曰太子弘天后方圖稱制惡其聰明酖殺之立次子雍王賢賢內憂懼作黃臺瓜辭

冀以感悟天后天后不聽賢卒死於黔中其辭曰種瓜黃臺下瓜熟子離離一摘使瓜好再摘使瓜稀三摘猶為可四摘抱蔓歸今陛下已一摘矣慎無再摘肅宗愕然曰安有是哉卿錄是辭朕當書紳對曰陛下但識之於心何必形於外也是時廣平王有大功良娣忌之潛構流言故泌言及之泌復固請歸山肅宗曰俟將發此議之

肅宗迎明皇於蜀

成都使還上皇誥曰當與我劒南一道自奉不復來矣
肅宗憂懼不知所為數日後使者至言上皇初得上請
歸東宮表彷徨不能食欲不歸及羣臣表至乃大喜命
食作樂下誥定行日肅宗召李泌告之曰皆卿力也泌
求歸山不已肅宗固留之不能得乃聽歸衡山敕郡縣
為之築室於山中給三品料

明皇還京師

上皇至鳳翔從兵六百餘人上皇命悉以甲兵輸郡庫

肅宗發精騎三千奉迎上皇至咸陽肅宗備法駕迎於望賢宮上皇在宮南樓肅宗釋黃袍著紫袍望樓下馬趨進拜舞於樓下上皇降樓撫肅宗而泣肅宗捧上皇足嗚咽不自勝上皇索黃袍自為肅宗著之肅宗伏地頓首固辭上皇曰天數人心皆歸於汝使朕得保養餘齒汝之孝也肅宗不得已受之父老在仗外歡呼且拜肅宗令開仗縱千餘人入謁上皇曰臣等今日復睹二聖相見死無恨矣上皇不肯居正殿曰此天子之位也

肅宗固請目扶上皇登殿尚食進食肅宗品嘗而薦之
將發行宮肅宗親為上皇習馬而進之上皇上馬肅宗
親執轡行數步上皇止之肅宗乘馬前引不敢當馳道
上皇謂左右曰吾為天子五十年未為貴今為天子父
乃貴耳左右皆呼萬歲上皇自開遠門入大明宮御舍
元殿慰撫百官乃詣長樂殿謝九廟主慟哭久之即日
幸興慶宮遂居之肅宗累表請避位還東宮上皇不許

李泌諫廢順宗

貞元三年初邵國大長公主適駙馬都尉蕭升主女為太子妃或告主淫亂且為厭禱德宗大怒幽主於禁中切責太子太子不知所對請與蕭妃離昏德宗召李泌告之且曰舒王近已長立孝友溫仁泌曰何至於是陛下惟有一子奈何一旦疑之欲廢之而立姪得無失計乎德宗勃然怒曰卿何得間人父子誰語卿舒王為姪者對曰大歷初陛下語臣今日得數子臣請其故陛下言昭靖諸子主上令吾子之今陛下所生之子猶疑之

何有於姪舒王雖孝自今陛下宜努力勿復望其孝矣
自古父子相疑未有不亡國覆家者陛下記昔在彭原
建寧何故而誅德宗曰建寧叔實冤肅宗性急譖之者
深耳泌曰先帝自建寧之死常懷危懼臣亦為先帝誦
黃臺瓜辭以防讒構之端德宗曰朕固知之意色稍解
乃曰貞觀開元皆易太子何故不亡對曰昔承乾屢嘗
監國託附者衆東宮甲士甚多與宰相侯君集謀反事
覺太宗使其舅長孫无忌與朝廷數十人鞠之事狀顯

白然後集百官而議之當時言者猶云願陛下不失為
慈父使太子得終天年太宗從之并廢魏王泰陛下既
知肅宗急以建寧為寃臣不勝慶幸願陛下戒覆車之
失若果有其迹願陛下如貞觀之法行之并廢舒王而
立皇孫則百代之後有天下者猶陛下子孫也至於開
元之時武惠妃譖太子瑛兄弟殺之海內寃憤此乃百
代所當戒又可法乎且陛下昔嘗令太子見臣於蓬萊
池觀其容表非有蠶目豺聲商臣之相也正恐失於柔

仁耳又太子自貞元以來常居少陽院在寢殿之側未嘗接外人預外事安有異謀乎彼譖人者巧詐百端雖有手書如晉愍懷衷甲如太子瑛猶未可信況但以妻母有罪為累乎幸賴陛下語臣臣敢以家族保太子必不知謀臯使楊素許敬宗李林甫之徒承此旨已就舒王圖定策之功矣上曰為卿遷延至明日思之太子遣人謝泌曰若必不可救欲先自仰藥何如泌曰必無此慮願太子起敬起孝間一日上開延英殿獨召泌流涕

闡干撫其背曰非卿切言朕今日悔無及矣皆如卿言
太子仁孝實無它也自今軍國及朕家事皆當謀於卿
矣泌拜賀因曰陛下聖明察太子無罪臣報國畢矣

王叔文之黨惡聞立太子

永貞元年順宗疾久不愈時扶御殿羣臣瞻望而已莫
有親奏對者中外危懼思早立太子而王叔文之黨欲
專大權惡聞之宦官俱文珍劉光琦薛盈珍等皆先朝
任使舊人疾叔文忠言等朋黨專恣乃啓順宗召翰林

學士鄭絪衛次公李程王涯入金鑾殿草立太子制時
牛昭容輩以廣陵王淳英睿惡之絪不復請書紙為立
嫡以長字呈順宗順宗頷之立淳為太子更名純

元稹請擇修正之士輔導諸子

元和元年元稹以貞元中王伾王叔文以伎術得幸東
宮永貞之際幾亂天下上書勸憲宗早擇修正之士使
輔導諸子以為太宗自為藩王與文學清修之士十八
人居後代太子諸王雖有僚屬日益踈賤至於師傅之

官非眊贖廢疾不任事者則休戎罷帥不知書者為之
其友諭贊議之徒尤為冗散之甚縉紳皆恥由之就使
得僻老儒生越月踰時僅獲一見又何暇傳之德義納
之法度哉夫以匹士愛其子猶知求明哲之師而教之
况萬乘之嗣繫四海之命乎憲宗頗嘉納其言時召見
之

李絳等請立儲闡

四年翰林學士李絳等奏曰陛下嗣膺大寶四年于茲

而儲闈未立典冊不行是開窺覩之端乖重慎之義非所以承宗廟重社稷也伏望抑撝謙之小節行至公之大典遂立長子鄧王寧為皇太子

韋綬悅太子以珍膳諧謔

十二年諫議大夫韋綬兼太子侍讀每以珍膳餉太子又悅太子以諧謔憲宗聞之罷綬侍讀尋出為虔州刺史

穆宗升儲副崔羣為羽翼

十五年以湖南觀察使崔羣為吏部侍郎召對別殿穆宗曰朕升儲副知卿為羽翼對曰先帝之意久屬聖明臣何力之有

裴度等請立景王湛為太子

長慶二年穆宗與宦者擊毬於禁中有宦者墜馬穆宗驚因得風疾不能履地自是不聞穆宗起居宰相屢乞入見不報裴度三上疏請立太子且請入見十二月辛卯穆宗見羣臣於紫宸殿御大繩牀悉去左右衛官

獨宦者十餘人侍側人情稍安李逢吉進言景王已長請立為太子裴度請遠下詔副天下望穆宗無言既而兩省官亦繼有請立太子者癸巳詔立景王湛為皇太子

韋溫辭太子侍讀

開成二年給事中韋溫為太子侍讀晨詣東宮日中乃得見溫諫曰太子當雞鳴而起問安視膳不宜專事宴安太子不能用其言溫乃辭侍讀遂罷守本官

文宗議廢太子

三年太子永之母王德妃無寵為楊賢妃所譖而死太子頗好遊宴昵近小人賢妃日夜毀之文宗開延英召宰相及兩省御史郎官疏太子過惡議廢之曰是宜為天子乎羣臣皆言太子年少容有改過國本至重豈可輕動御史中丞狄蕪謏論之尤切至於涕泣給事中韋溫曰陛下惟一子不教陷之至是豈獨太子之過乎翰林學士六人神策六軍軍使十六人復上表論之文宗

意稍解是夕太子始得歸少陽院

仇士良等矯詔立武宗

五年文宗疾甚命知樞密劉弘逸薛季稜引楊嗣復李珣至禁中欲奉太子監國中尉仇士良魚弘志以太子之立功不在己乃言太子幼且有疾更議所立李珣曰太子位已定豈得中變士良弘志遂矯詔立瀍為太弟是日士良弘志將兵詣十六宅迎潁王至少陽院文宗崩於太和殿仇士良說太弟賜楊賢妃安王溶陳王成

美死敕大行以十四日殯成服諫議大夫裴夷直上言
期日太遠不聽時仇士良等追怨文宗凡樂工及內侍
得幸於文宗者誅貶相繼夷直復上言陛下自藩維繼
統是宜儼然在疚以哀慕為心速行喪禮草議大政以
慰天下而未及數日屢誅戮先帝近臣驚率土之視聽
傷先帝之神靈人情何瞻國體至重若使此輩無罪固
不可刑若其有罪彼已在天網之內無所逃伏旬日之
外行之何晚不聽

立宣宗為太叔

會昌六年武宗自正月乙卯不視朝宰相請見不許中外憂懼初憲宗納李錡妾鄭氏生光王怡怡幼時宮中皆以為不慧太和以後益自韜匿羣居遊處未嘗發言文宗幸十六宅宴集好誘其言以為戲笑號曰光叔武宗性豪邁尤所不禮及武宗疾篤旬日不能言諸宦官密於禁中定策下詔稱皇子沖幼須選賢德光王怡可立為皇太叔更名忱應軍國政事令權勾當太叔見百

官哀戚滿容裁決庶務咸當於理人始知有隱德焉

魏謩請建儲副

大中四年以魏謩同平章事仍判戶部時宣宗春秋已高未立太子羣臣莫敢言謩入謝因言今海內無事惟未建儲副使正人輔導臣竊以為憂且泣時人重之

裴休請早建太子

十年宣宗命裴休極言時事休請早建太子宣宗曰若建太子則朕遂為閒人休不敢復言休以疾辭位不許

崔慎由言建儲罷相

十二年以中書侍郎同平章事崔慎由為東川節度使
宣宗欲御樓肆赦令狐綯曰御樓所費甚廣事須有名
且赦不可數宣宗不悅曰遣朕於何得名慎由曰陛下
未建儲宮四海屬望若舉此禮雖郊祀亦可況於御樓
時宣宗餌方士藥已覺躁渴而外人未知疑忌方深聞
之俛首不復言旬日慎由罷相

王宗實立懿宗

十三年初宣宗長子鄆王溫無寵居十六宅餘子皆居禁中夔王滋第三子也宣宗愛之欲以為嗣為其非次故久不建東宮宣宗餌醫官李元伯道士虞紫芝山人王樂藥疽發於背八月疽甚宰相及朝臣皆不得見宣宗密以夔王屬樞密使王歸長馬公儒宣徽南院使王居方便立之三人及右軍中尉王茂元皆宣宗平日所厚也獨左軍中尉王宗實素不同心三人相與謀出宗實為淮南監軍宗實已受敕於宣化門外將自銀臺門

出左軍副使元實謂宗實曰聖人不豫踰月中尉止
隔門起居今日除改未可辨也何不見聖人而出宗實
感寤復入諸門已踵故事增人守捉矣元實翼導宗
實直至寢殿宣宗已崩東首環泣矣宗實叱歸長等貴
以矯詔皆捧足乞命乃遣宣徽北院使齊元簡迎鄆王
立為皇太子權句當軍國政事仍更名淮收歸長公儒
居方皆殺之宣遺制以令狐綯攝冢宰宣宗性明察沈
斷用法無私從諫如流重惜官賞恭謹節儉惠愛民物

故大中之政訖於唐亡人思詠之謂之小太宗

晉王存勗殺李克寧

梁太祖開平二年晉王病篤命其弟克寧監軍張承業大將李存璋吳珙掌書記盧質立其子存勗為嗣曰此子志氣遠大必能成吾事爾曹善教導之又謂克寧等曰以亞子累汝亞子存勗小名也言終而卒克寧久總兵柄有次立之勢軍中以存勗年少多竊議者人情恟恟存勗懼以位讓克寧克寧曰汝冢嗣也且有先王之

命誰敢違之克寧首帥諸將拜賀王悉以軍府事委之初晉王克用多養軍中壯士為子寵遇如真子及晉王存勗立諸假子皆年長握兵心怏怏不服或託疾不出或見新王不拜李克寧權位既重人情多向之假子李存勗陰說克寧曰兄終弟及自古有之以叔拜姪於理安乎天與不取後悔無及克寧曰吾家世以慈孝聞天下先王之業苟有所歸吾復何求汝勿妄言我且斬汝克寧妻孟氏素剛悍諸假子各遣其妻入說孟氏孟氏

以為然且慮語泄及禍數以道克寧克寧性怯朝夕惑於衆言心不能無動李存顯等為克寧謀因晉王過其第殺承業存璋奉克寧為節度使舉河東九州附于梁執晉王及太夫人曹氏送大梁太原人史敬鎔少事晉王克用居帳下見親信克寧欲知府中陰事召敬鎔密以謀告之敬鎔陽許之入告太夫人太夫人大駭晉王曰至親不可自相魚肉吾苟避位則亂不作矣承業曰克寧欲投大王母子於虎口不除之豈有全理乃召李

存璋吳珙及假子李存敬長直軍使朱守殷使陰為之
備置酒會諸將於府舍伏甲執克寧存顥於座晉王流
涕數之曰兒鄉以軍府讓叔父叔父不取今事已定奈
何復為此謀忍以吾母子遺仇讐乎克寧曰此皆讒人
交構夫復何言是日殺克寧及存顥

淮南嚴可求面折張顥

淮南張顥徐溫專制軍政弘農威王心不能平欲去之
而未能二人不自安共謀弑王分其地以臣於梁顥遣

其黨紀祥等弑王於寢室許云暴薨顥集將吏於府廷
交道及庭中堂上皆列白刃令諸將悉去衛從然後入
顥厲聲問曰嗣王已薨軍府誰當主之三問莫應顥氣
色益怒幕僚嚴可求前密啓曰軍府至大四境多虞非
公主之不可然今日則恐太速顥曰何謂速也可求曰
劉威陶雅李遇李簡皆先王之等夷公今自立此曹肯
為公下乎不若立幼主輔之諸將孰敢不從顥默然久
之可求因屏左右急書一紙置袖中麾同列詣使宅賀

衆莫測其所為既至可求跪讀之乃太夫人史氏教也大要言先王創業艱難嗣王不幸早世隆演次當立諸將宜無負楊氏善輔導之辭旨明切顥氣色皆沮以其義正不敢奪遂奉威王弟隆演稱淮南留後東面諸道行營都統既罷副都統朱瑾詣可求所居曰瑾年十六七即橫戈躍馬衝犯大敵未嘗畏懾今日對顥不覺流汗公面折之如無人乃知瑾匹夫之勇不及公遠矣因以兄事之

梁友珪弒逆自立

乾化二年太祖長子郴王友裕早卒次假子博王友文
太祖特愛之常留守東都郢王友珪無寵友文婦王氏
色美帝尤寵之雖未以友文為太子太祖意常屬之友
珪心不平友珪嘗有過太祖撻之友珪益不自安太祖
疾甚命王氏召友文於東都欲與之訣且付以後事友
珪婦張氏亦朝夕侍太祖側知之密告友珪曰大家以
傳國寶付王氏懷往東都吾屬死無日矣夫婦相泣左

右或說之曰事急計生何不改圖時不可失會命敬翔
出友珪為萊州刺史時左遷者多追賜死友珪益恐遂
與韓勅合謀勅以牙兵五百人從友珪雜控鶴士入伏
於禁中中夜斬關入至寢殿太祖驚起問反者為誰友
珪曰非它人也太祖曰我固疑此賊恨不早殺之汝悖
逆如此天地豈容汝乎友珪僕夫馮廷諤刺帝腹刃出
於背友珪自以敗氈裹之瘞於寢殿祕不發喪遣供奉
官丁昭溥馳詣東都命均王友貞殺友文矯詔稱博王

友文謀逆遣兵突入殿中賴郢王友珪忠孝將兵誅之保全朕躬然疾因震驚彌致危殆宜令友珪權主軍國之務韓勅為友珪謀多出府庫金帛賜諸軍及百官以取悅丁昭溥還聞友文已死乃發喪宣遺制友珪即皇帝位

均王殺友珪自立

三年郢王友珪既得志遽為荒淫內外憤怒均王友貞密謀誅友珪乃遣腹心馬慎交之魏州說楊師厚曰郢

王篡弑人望屬在大梁公若因而成之此不世之功也
且許事成之日賜犒軍錢五十萬緡師厚與將佐謀之
曰方郢王弑逆吾不能即討今君臣之分已定無故改
圖可乎或曰郢王親弑君父賊也均王舉兵復讐義也
奉義討賊何君臣之有彼若一朝破賊公將何以自處
乎師厚驚曰吾幾誤計乃遣其將王舜賢至洛陽陰與
袁象先謀遣朱漢賓將兵屯滑州為外應友珪治龍驤
軍潰亂者搜捕其黨獲者族之經年不已時龍驤軍有

成大梁者友珪徵之均王因使人激怒其衆曰天子以懷州屯兵叛追汝輩欲盡坑之其衆皆懼莫知所為將校見均王泣請可生之路王曰先帝與汝輩三十餘年征戰經營王業今先帝尚為人所弑汝輩安所逃死乎因出太祖畫像示之而泣曰汝能自趣洛陽雪讐恥則轉禍為福矣衆皆踊躍呼萬歲請兵仗王給之袞象先等帥禁兵數千人突入宮中友珪聞變與妻張氏及馮廷諤趨北垣樓下將踰城自度不免令廷諤先殺妻次

殺已廷諤亦自剄象先等齋傳國寶詣大梁迎均王
曰大梁國家創業之地何必洛陽乃即帝位於大梁復
稱乾化三年追廢友珪為庶人復博王友文官爵

蜀太子作亂

蜀太子元膺猥喙齟齬目視不正而警敏知書善騎射
性狷急猜忍蜀主命杜光庭選純靜有德者使侍東宮
光庭薦儒者許寂徐簡夫太子未嘗與之交言日與樂
工羣小嬉戲無度僚屬莫敢諫秋七月蜀主將以七夕

出遊太子召諸王大臣宴飲集王宗翰潘峭毛文錫不至太子怒曰集王不來必峭與文錫離間也徐瑤常譙素為太子所親信酒行屢目少保唐道襲道襲懼而起太子入白蜀主曰潘峭毛文錫離間兄弟蜀主怒命貶逐峭文錫太子出道襲入蜀主以其事告之道襲曰太子謀作亂欲召諸將諸王以兵錮之然後舉事耳蜀主疑焉遂不出道襲請召屯營兵入宿衛許之內外戒嚴太子初不為備聞道襲召兵乃以天武甲士自衛捕潘

峭毛文錫至搃之幾死囚諸東宮徐瑤常譙等各帥所部兵奉太子攻道襲至清風樓道襲引屯營兵出拒戰道襲中流矢遂至城西斬之潘炕言於蜀主曰太子與唐道襲爭權耳無它志也陛下宜面諭大臣以安社稷蜀主乃發兵討為亂者譙與太子奔龍躍池匿於艦中及暮稍定太子出就舟人旬食舟人以告蜀主遣集王宗翰往慰撫之比至太子已為衛士所殺蜀主疑宗翰殺之大慟不已左右恐事變會張格呈慰諭軍民榜讀

至不行斧鉞之誅將誤社稷之計蜀主收涕曰朕何敢以私害公於是下詔廢太子元膺為庶人左右坐誅死者數十人貶竄者甚衆

蜀主立宗衍為太子

蜀潘炕屢請立太子蜀主以雅王宗輅類已信王宗傑才敏欲擇一人立之鄭王宗衍最幼其母徐賢妃有寵欲立其子使飛龍使唐文展諷張格上表請立宗衍格夜以表示功臣王宗侃等詐云受密旨衆皆署名蜀主

令相者視諸子亦希旨言鄭王相最貴蜀主以為衆人實欲立宗衍不得已許之曰宗衍幼懦能堪其任乎立宗衍為太子受冊畢潘炕以朝廷無事稱疾請老蜀主不許涕泣固請乃許之國有大疑常遣使就第問之

蜀太子衍好酒色

梁均王貞明四年蜀太子衍好酒色樂遊戲蜀主嘗自夾城過聞太子與諸王鬪雞擊毬喧呼之聲歎曰吾百戰以立基業此輩其能守之乎由是惡張格而徐賢妃

為之內主竟不能去也信王宗傑有才畧屢陳時政蜀主賢之有廢立意忽宗傑暴卒蜀主深疑之蜀主自永平未得疾昏瞽至是增劇以王宗弼沉靜有謀召還以為馬步都指揮使召大臣入寢殿告之曰太子仁弱朕不能違諸公之請踰次而立之若其不堪大業可置諸別宮幸勿殺之但王氏子弟諸公擇而輔之徐妃兄弟止可優其祿位慎勿使之掌兵預政以全其宗族

後唐明宗不肯改國號

天成元年有司議即位禮李紹真孔循以為唐運已盡
宜自建國號明宗問左右何謂國號對曰先帝賜姓於
唐為唐復讎繼昭宗後故稱唐今梁朝之人不欲殿下
稱唐耳明宗曰吾年十三事獻祖獻祖以吾宗屬視吾
猶子又事武皇垂三十年先帝垂二十年經綸攻戰未
嘗不預武皇之基業則吾之基業也先帝之天下則吾
之天下也安有同家而異國乎令執政更議吏部尚書
李琪曰若改國號則先帝遂為路人梓宮安所託乎不

惟殿下不忘三世舊君吾曹為人臣者能自安乎前代以旁支入繼多矣宜用嗣子柩前即位之禮衆從之明宗自興聖宮赴西宮服斬衰於柩前即皇帝位百官縞素既而御袞冕受冊百官吉服稱賀

契丹舒嚕后愛中子德光為天皇王

契丹舒嚕后愛中子德光欲立之至西樓命與托雲俱乘馬立帳前謂諸酋長曰二子吾皆愛之莫知所立汝曹擇可立者執其轡酋長知其意爭執德光轡謹躍曰

願事元帥太子后曰衆之所欲吾安敢違遂立之為天皇王托雲愠帥數百騎欲奔唐為邏者所遏舒嚕后不罪遣歸東丹天皇王尊舒嚕后為太后國事皆決焉太后復納其姪為天皇王后天皇王性孝謹母病不食亦不食侍於母前應對或不稱旨母揚眉視之輒懼而趨非復名不敢見也

吳徐溫欲以知詢代知誥

二年吳東海王徐溫卒初溫子知詢以其兄知誥非徐

氏子數請代之執吳政溫曰汝曹皆不如也嚴可求及徐玠屢勸溫以知詢代知誥溫以知誥孝謹不忍也陳夫人曰知誥自我家貧賤時養之奈何富貴而棄之可求等言之不已溫欲帥諸藩鎮入朝勸吳王稱帝將行有疾乃遣知詢奉表勸進因留代知誥執政知誥草表欲求洪州節度使俟旦上之是夕溫凶問至乃止知詢亟歸金陵吳王贈溫齊王謚曰忠武

楚臣許德勲稱楚必俟衆駒爭早棧然後可圖

三年吳遣使求和於楚請苗璘王彥章楚王殷歸之使
許德勲餞之德勲謂二人曰楚國雖小舊臣宿將猶在
願吳朝勿以措懷必俟衆駒爭阜棧然後可圖也時馬
殷多內寵嫡庶無別諸子驕奢故德勲語及之

吳越王鏐欲立中子傳瓘

吳越王鏐欲立中子傳瓘為嗣謂諸子曰各言汝功吾
擇多者而立之傳瓘兄傳璿傳璟皆推傳瓘乃奏
請以兩鎮授傳瓘遂詔以傳瓘為鎮海鎮東節度使

張昭遠請定嫡庶長幼之分

張昭遠上言臣竊見先朝時皇弟皇子皆喜俳優入則飾姬妾出則誇僕馬習尚如此何道能賢諸皇子宜精擇師傅令皇子屈身師事之講禮義之經論安危之理古者人君即位則建太子所以明嫡庶之分塞禍亂之源今卜嗣建儲臣未敢輕議至於恩澤賜與之間昏姻省侍之際嫡庶長幼宜有所分示以等威絕其僥冀明宗賞歎其言而不能用

吳越王元瓘襲位

長興三年吳越武肅王錢鏐寢疾謂將吏曰吾疾必不起諸兒皆愚懦誰可謂帥者衆泣曰兩鎮令公仁孝有功孰不愛戴鏐乃悉出印鑰授傳瓘曰將吏推爾宜善守之又曰子孫善事中國勿以易姓廢事大之禮卒年八十一傳瓘與兄弟同幄行喪內牙指揮使陸仁章曰令公嗣先王霸業將吏旦暮趨謁當與諸公子異處乃命主者更設一幄扶傳瓘居之告將吏曰自今惟謁令

公禁諸公子從者無得妄入盡夜警衛未嘗休息鏐末
年左右皆附傳瓘獨仁章數以事犯之至是傳瓘勞之
仁章曰先王在位仁章不知事令公今日盡節猶事先
王也傳瓘嘉歎久之傳瓘既襲位更名元瓘兄弟名傳
者皆更為元以遺命去國儀用藩鎮法

明宗不欲立秦王榮為太子

四年何澤見明宗寢疾秦王從榮權勢方盛冀已復進
用表請立從榮為太子明宗覽表泣下私謂左右曰羣

臣請立太子朕當歸老太原舊第耳不得已詔宰相樞密使議之從榮見明宗言曰竊聞有姦人請立臣為太子臣幼少且願學治軍民不願當此名明宗曰羣臣所欲也從榮退見范延光趙延壽曰執政欲以吾為太子是欲奪我兵柄幽之東宮耳延光等知明宗意且懼從榮之言即具以白明宗遂以從榮為天下兵馬大元帥從榮以兵反見殺

明宗以親軍都指揮使康義誠為朴忠親任之時要近

之官多求出以避秦王之禍明宗疾復作大漸秦王從
榮入問疾明宗俛首不能舉王淑妃曰從榮在此明宗
不應從榮出聞宮中皆哭從榮意明宗已殂明旦稱疾
不入是夕明宗實小愈而從榮不知從榮自知不為時
論所與恐不得為嗣與其黨謀欲以兵入侍先制權臣
從榮遣都押牙馬處鈞謂朱弘昭馮贊曰吾欲帥牙兵
入宮中侍疾且備非常當止於何所二人曰王自擇之
遂自河南府常服將步騎千人陳於天津橋是日黎明

從榮遣馬處鈞至馮贇第語之曰吾今日決入且居興
聖宮公輩各有宗族處事亦宜詳允禍福在須臾耳贇
馳入右掖門見弘昭義誠漢瓊及三司使孫岳方聚謀
於中興殿門外監門白秦王已將兵至端門外漢瓊見
明宗曰從榮反兵已攻端門須臾入宮則大亂矣宮中
相顧號哭明宗曰從榮何苦乃爾問弘昭等有諸對曰
有之適已令門者闔門矣明宗指天泣下謂義誠曰卿
自處置勿驚百姓漢瓊被甲乘馬召馬軍都指揮使朱

洪實使將五百騎討從榮從榮大驚命取鐵掩心環之坐調弓矢俄而騎兵大至從榮走歸府與妃劉氏匿牀下皇城使安從益就斬之并殺其子以其首獻明宗聞從榮死悲駭幾落御榻絕而復蘇者再由是疾復劇馮道帥羣臣入見明宗於雍和殿明宗雨泣嗚咽曰吾家事至此慙見卿等

潞王兵至長安閔帝欲遜位

清泰元年潞王既與朝廷猜阻朝廷又命洋王從璋權

知鳳翔路王聞其來尤惡之欲拒命則兵弱糧少不知所為謀於將佐皆曰主上富於春秋政事出於朱馮大王功名震主離鎮必無全理不可受也王乃移檄鄰道言朱弘昭等乘先帝疾亟殺長立少專制朝權別踈骨肉動搖藩垣懼傾覆社稷今從珂將入朝以清君側之惡而力不能獨辦願乞靈隣藩以濟之潞王使者多為鄰道所執不則依阿操兩端惟隴州防禦使相里金傾心附之遣判官薛文遇往來計事朝廷議討鳳翔諸道

兵大集於城下攻之期於必取鳳翔城塹卑淺守備俱
乏衆心危急潞王登城泣謂外軍曰吾未冠從先帝百
戰出生死金創滿身以立今日之社稷汝曹從我目
睹其事今朝廷信任讒臣猜忌骨肉我何罪而受誅乎
因慟哭聞者哀之楊思權因大呼曰大相公吾主也遂
帥諸軍解甲投兵請降於潞王王思同猶未之知趨士
卒登城尹暉大呼曰城西軍已入城受賞矣衆爭棄甲
投兵而降其聲震地日中亂兵悉入外軍亦潰思同等

六節度使皆遁去潞王建大將旗鼓整衆而東至長安
西京副留守劉遂雍迎謁率民財以充賞是日西面步
軍都監王景從等自軍前奔還中外大駭閔帝不知所
為謂康義誠等曰先帝棄萬國朕外守藩方當是之時
為嗣者在諸公所取耳朕實無心與人爭國既承大業
年在幼冲中國事皆委諸公朕於兄弟間不至榛梗諸公
以社稷大計見告朕何敢違軍興之初皆自夸大以為
寇不足平今事至於此何方可以轉禍朕欲自迎潞王

以大位讓之若不免於罪亦所甘心朱弘昭馮贇大懼不敢對

潞王即帝位

潞王至蔣橋百官班迎於路傳教以未拜梓宮未可相見馮道等皆上牋勸進王入謁太后太妃詣西宮伏梓宮慟哭自陳詣闕之由馮道帥百官班見拜王荅拜道等復上牋勸進王立謂道等曰予之此行事非獲已俟皇帝歸闕園寢禮終當還守藩服羣公遽言及此甚無

謂也太后下令廢少帝為鄂王以潞王知軍國事權以書詔印施行百官詣至德宮門待罪王命各復其位太后令潞王宜即皇帝位遂即位於柩前

蜀主孟知祥立子仁贊

蜀主得風疾踰年至是增劇遂立子東川節度使同平章事親衛馬步都指揮使仁贊為太子仍監國召司空同平章事趙季良等受遺詔輔政是夕殂祕不發喪王處回夜啓義興門告趙季良處回泣不已季良止色曰

今疆將握兵專伺時變宜速立嗣君以絕覬覦豈可但相泣邪處回收淚謝之李良教處回見李仁罕審其詞旨然後告之處回至仁罕第仁罕設備而出遂不以實告丙寅宣遺制命太子仁贊更名昶即皇帝位

吳王令謀勸齊王誥受禪

後晉高祖天福二年八月吳司徒王令謀老病無齒或勸之致仕令謀曰齊王大事未畢吾何敢自安疾亟力勸徐誥受禪是月吳主下詔禪位于齊李德誠等復詣

金陵帥百官勸進吳主命江夏王璘奉璽綬于齊冬十月齊王誥即皇帝位于金陵大赦改元昇元國號唐追尊太祖武王曰武皇帝遣右丞相玠奉冊請吳主稱受禪老臣誥謹拜稽首上皇帝尊號曰高尚思玄弘古讓皇宮室乘輿服御皆如故宗廟正朔徽章服色悉從吳制

吳越王元瓘屬章德安以後事

六年八月吳越文穆王元瓘寢疾察內都監使章德安

忠厚能斷大事欲屬以後事語之曰弘佐尚少當擇宗人長者立之德安曰弘佐雖少羣下伏其英敏願王勿以為念王曰汝善輔之吾無憂矣元瓘卒將吏以元瓘遺命承制以鎮海鎮東節度副太使弘佐為節度使時年十四九月庚申弘佐即王位溫恭好書禮士躬勤政務發摘姦伏人不能欺民有獻嘉禾者弘佐問倉吏今蓄積幾何對曰十年王曰然則軍食足矣可以寬吾民乃命復其境內稅三年

南漢高祖從蕭益立長之對

七年南漢高祖寢疾以其子秦王弘度晉王弘熙皆驕恣少子越王弘昌孝謹有智識與右僕射兼西御院使王翺謀出弘度鎮邕州弘熙鎮容州而立弘昌制命將行會崇文使蕭益入問疾以其事訪之益曰立嫡以長違之必亂乃止高祖殂秦王弘度即皇帝位更名玠以弘熙輔政改元光天尊母趙昭儀曰皇太妃

後晉高祖令抱幼子置馮道懷中

高祖寢疾一旦馮道獨對高祖命幼子重睿出拜之又令宦者抱重睿置道懷中其意蓋欲道輔立之六月乙丑帝殂道與天平節度使侍衛馬步都虞侯景延廣議以國家多難宜立長君乃奉廣晉尹齊王重貴為嗣是日齊王即皇帝位延廣以為己功始用事禁都下人毋得偶語

南唐主怒齊王璟調樂器

八年南唐宣城王景達剛毅開爽烈祖愛之屢欲以為

嗣宋齊丘亟稱其才唐主以齊王璟年長而止璟以是
怨齊丘唐主幼子景暹母种氏有寵齊王璟母宋皇后
稀得進見唐主如璟宮遇璟親調樂器大怒誚讓者數
日种氏乘間言景暹雖幼而慧可以為嗣唐主怒曰子
有過父訓之常事也國家大計女子何得預知即命嫁
之

楚立馬希廣

十二年馬希廣楚文昭王希範之母弟也性謹順希範

愛之使判內外諸司事希範卒將佐議所立都指揮使
張少敵都押牙袁友恭以武平節度使知永州事希萼
於希範諸弟為最長請立之長直都指揮使劉彥瑫天
策府學士李弘臯鄧懿文小門使楊滌皆欲立希廣張
少敵曰永州齒長而性剛必不為都尉之下明矣必立
都尉當思長策以制永州使帖然不動則可不然社稷
危矣彥瑫等不從天策府學士拓跋恒曰三十五郎雖
判軍府之政然三十郎居長請遣使以禮讓之不然必

起爭端彥瑫等皆曰今日軍政在手天與不取它人得之異日吾輩安所自容乎希廣懦弱不能自決彥瑫等稱希範遺命立之張少敵退而歎曰禍其始此乎與拓跋恒皆稱疾不出

後漢蘇逢吉等受顧命立皇子承祐

乾祐元年高祖自魏王承訓卒悲痛過甚不豫大漸召蘇逢吉楊邠史弘肇郭威入受顧命曰余氣息微不能多言承祐幼弱後事託在卿輩又曰善防重威是日殂

子萬歲殿逢吉等祕不發喪下詔稱重威父子因朕小疾謗議搖衆并其子弘璋弘璉弘璨皆斬之晉公主及內外親族一切不問磔重威尸於市市人爭啖其肉吏不能禁斯須而盡立皇子承祐為周王同平章事有頃發喪宣遺制令周王即皇帝位時年十八

郭威請早立嗣君

三年郭威帥百官詣明德門起居太后且奏稱軍國事殷請早立嗣君太后誥稱郭允明弑逆神器不可無主

河東節度使崇忠武節度使信皆高祖之弟武寧節度使贇開封尹勲高祖之子其令百官議擇所宜贇宗之子也高祖愛之養視如子郭威王峻入見太后於萬歲宮請以勲為嗣太后曰勲久羸疾不能起威出諭諸將諸將請見之太后令左右以卧榻舉之示諸將諸將乃信之於是郭威與峻議立贇郭威帥百官表請以贇承大統太后誥所司擇日備法駕迎贇即皇帝位郭威奏遣太師馮道及樞密直學士王度祕書監趙上交詣徐

州奉迎

後周太祖選朝士為皇太子僚佐

廣順元年二月以皇子天雄牙內都指揮使榮為鎮寧
節度使選朝士為之僚佐以侍御史王敏為節度判官
右補闕崔頌為觀察判官校書郎王朴為掌書記

曹翰請晉王榮入侍醫藥

顯德元年初太祖在鄴都奇愛小吏曹翰之才使之事
晉王榮榮鎮澶州以為牙將榮入為開封尹未即召翰

翰自至榮怪之翰請問言曰大王國之儲嗣今主上寢疾大王當入侍醫藥奈何猶決事於外邪榮感悟即日入止禁中太祖疾篤停諸司細務皆勿奏有大事則晉王榮稟進止宣行之

南唐太子弘冀使袁從範毒殺太弟景遂

五年唐太弟景遂前後凡十表辭位且言今國危不能扶請出就藩鎮燕王弘冀嫡長有軍功立為嗣謹奉上太弟寶冊唐主乃立景遂為晉王加天策上將軍江南

西道兵馬元帥洪州大都督太尉尚書令立弘冀為皇太子參決庶政弘冀為人猜忌嚴刻景遂左右有未出東宮者立斥逐之其弟安定公從嘉畏之不敢預事專以經籍自娛弘冀在東宮多不法唐主怒嘗以毬杖擊之曰吾當復召景遂昭慶宮使袁從範從景遂為洪州都押牙或譖從範之子於景遂景遂欲殺之從範由是怨望弘冀聞之密遣從範毒之八月庚辰景遂擊毬渴甚從範進漿景遂飲之而卒未殯體已潰唐主不之知

贈皇太弟謚曰文成

通鑑總類卷五上